

"Mpo ete Njambe alingaki mokili na motindo boye ete apesi Mwana-na-likinda na ye ete moto na moto oyo akondima ye abebisama te kasi ete ajala na bomoi na seko. ... Bolingo ejali boye te ete biso tolingaki Njambe, kasi ejali boye ete ye alingaki biso mpe atindaki Mwana na ye lokola mbondi mpo na masumu na biso."

(Yoane 3:16, 1Yoane 4:10)

Mwana amonisaki biso nkombo na Tata

Wana mikolo na Yesu koyoka mpasi mikomaki, biso toyokameli maloba ye alobaki na Tata ete, "Bato baoyo opesi ngai bango uta na mokili. Bajalaki na yo mpe opesi ngai bango mpe batosi liloba na yo. ... Tata Moyengebeni, bamokili bayebi yo te; nde ngai nayebi yo mpe baoyo bayebi ete yo otindi ngai. Nayebisi bango nkombo na yo mpe nakoyebisa yango ete bolingo bolingaki yo ngai na yango bojala kati na bango, ngai mpe kati na bango."

(Yoane 17:6, 25-26)

Baklisto bakosambelaka Tata mpo na Mwana

"Botonda Tata, ye oyo abongisi bino mpo na kojua likabo na bino na libula na Babulami kati na moi. Ye abikisi biso longwa na nkanga na molili mpe akotisi biso na bokonji na Mwana na ye na bolingo. Kati na ye tojali na lisiko, yango kolimbisama na masumu."

(Bakolose 1:12-14)

"Litatoli ejali boye ete Njambe apesi biso bomoi na seko mpe bomoi oyo ejali kati na Mwana na ye. Oyo ajali na Mwana ajali na bomoi, ye oyo ajangi Mwana na Njambe, ajangi bomoi. Nakomeli makambo oyo ete boyeba ete bojali na bomoi na seko, bino bato bokondimelaka nkombo na Mwana na Njambe."


(1 Yoane 5:11-13)

© C.E.R.S. - B.P. 1673 Kananga

République Démocratique Du Congo

Email: 33eme.cers.lit@gmail.com

<http://www.33eme-cers.org/>



Mwana na Njambe

Nkolo Yesu ajali Mwana na Njambe. Njambe ye moko amonisaki likambo oyo na ebale na Yaladene. "Esili Yesu kobatisama, abimi nokinoki na mai. Mpe tala, Likolo epaswani mpe ... Mpe mongongo uta na Likolo elobi ete, Oyo Mwana na ngai na bolingo, nasepeli ye mingi."

(Matai 3:16-17)

Njambe amonisaki likambo oyo lisusu na mokolo Yesu abongwanaki liboso na mayekoli na ye misato na ngomba. "Tala, lipata na kongenga ejipi bango mpe mongongo kati na lipata elobi ete, Oyo Mwana na ngai na bolingo, nasepeli ye mingi. Boyoka ye!"

(Matai 17:5)

Mwana ajalaki liboso na ebandelo na mokili

Toyokaki maloba malobelaki Nkolo Yesu Tata na ye, ete; "Tata, elaka esili kokoka. Kumisa Mwana na yo ete Mwana na yo akumisa yo. Ngai nasili kokumisa yo na mokili. Nasilisi mosala mopesi yo ngai ete nasala yango. Mpe sasaipi, Tata, kumisa ngai pembeni na yo na lokumu lojalaki na ngai pembeni na yo liboso, naino mokili ejalaki te. Tata, nalingi ete bango osili kopesa ngai bajala na ngai elongo na esika ejali ngai ete bamona lokumu na ngai losili yo kopesa ngai, jambi olingaki ngai liboso na kojalisama na mokili."

(Yoane 17:1, 4-5, 24)

Lokumu na Mwana

a) Mwana ... "Ye ajali elilingi na Njambe, oyo akomonanaka te, Mobotami na liboso na biloko yonso bijalisami."

(Bakolose 1:15)

b) Mwana ... "Ye ajali kongenga na nkembo na Njambe, ajali mpe elilingi na motindo na ye."

(Baebele 1:3)

c) Njambe ... "Mwana oyo atii ye mosangoli na libula na biloko yonso; na ye mpe ajalisaki bikeke ... Mpo kati na ye, biloko yonso bijalisamaki, na biloko na Likolo mpe biloko na nse, ... biloko yonso bijalisamaki na maboko na ye, mpe mpo na ye."

(Baebele 1:2. Bakolose 1:16)

d) Mwana "Akolendisaka biloko yonso na liloba na ye na nguya."

(Baebele 1 :3)

e) "Esili ye (Mwana) kobongisa epetweli mpo na masumu, afandi na loboko na mobali na Nkembo kuna na likolo."

(Baebele 1:3)

f) Njambe atii "Mwana oyo atii ye mosangoli na libula na biloko yonso; ... Ye ajali liboso na biloko yonso, ... Mpo Njambe asepelaki ete litondi na bonjambe yonso efanda kati na ye."

(Baebele 1:2. Bakolose 1:17, 19)

g) "Kasi mpo na Mwana, alobi ete, E Njambe, kiti na bokonji na yo ekoumela seko na seko, lingenda na sembo ejali lingenda na bokonji na ye".

(Baebele 1:8)

Njambe atindaki bato nsango epai na Mwana

Wana eyaki Mwana, Njambe moko alobelaki bato liloba na monoko na ye. Yesu ye moko alobaki ete, "Ngai naye na nkombo na Tata na ngai."

(Yoane 5:43)

"Kalakala Njambe asololaki na bankoko na minoko na basakoli na mbala mingi mpe na mitindo mingi. Na mikolo oyo na nsuka asololi na biso kati na Mwana."

(Baebele 1:1-2)

"Tata ajali kosambisa moto te, kasi asili kopesa kosambisa yonso epai na Mwana ete yonso bakumisa Mwana pelamoko ekokumisa bango Tata. Oyo akokumisaka Mwana te, akokumisaka mpe Tata, Motindi na ye te."

(Yoane 5:22, 23)

Njambe atomaki Mwana na ye mpo na ye ajala mobikisi na bato na mokili

Nsango Malamu na Njambe ejali "mpo na Mwana ne ye, Yesu Klisto, Nkolo na biso, oyo abotamaki lokola moto na libota na Dawidi. Kasi, mpo na Molimo Mosanto, Njambe amonisaki na nguya ete ajali Mwana na ye, awa esekwaki ye na kati na bakufi."

(Baloma 1:3-4)